

公開組

冠軍

【旅美重歸】黃磊

香江不減舊繁華，重上鑪峯四望賒。  
昔日客身今是主，丁年遊子老還家。  
樓臺高下連千戶，橋隧縱橫走萬車。  
耀眼圖騰新樣好，飛龍相伴紫荊花。

亞軍

【返鄉道上逢車壞遇雨】范逸文

市塵漸遠近田家，桑柳門前喜種瓜。  
隔岸沉雷憐吠犬，小池翻浪怯鳴蛙。  
啼鴉不斷難為客，陣雨重來易壞車。  
笑我今宵何處宿，鷓鴣聲裏夕陽斜。

季軍

【退休後返鄉間別業】葉崇正

行誦歸田賦，紅塵入望賒。  
清流窺雪鷺，落日過寒鴉。  
涼簟三山夢，晴窗七碗茶。  
忘機松下路，莫問紫薇花。

優異獎

(排名按姓氏筆畫序)

【殘菊】孫禮賢

冷淡生涯殿眾芳，天生傲骨戰秋霜。  
獨持正氣支荒圃，尚展衰顏佔夕陽。  
珍重枝頭留剩蕾，依稀籬外溢餘香。  
陶潛歸去知音少，愛此孤高老梓桑。

【書中乾蝶】張江美

曾經妙舞過東牆，引得莊生入夢鄉。  
檻外花開清影杳，燈前卷掩斷魂涼。  
春無復覓矜寥落，命有難留話短長。  
展讀堪嗟餘色相，何妨伴我近書香。

【客中過重陽】張星

寂寂殘燈薦小窗，萬家砧杵也淒涼。  
病侵短鬢驚寒早，夢入深秋覺夜長。  
雁翼乍斜溶落日，客衣未置過重陽。  
松溪兩載淹陶令，空負東籬菊又香。

## 公開組

### 優異獎

(排名按姓氏筆畫序)

#### 【落花】馮影仙

墜茵落溷兩茫茫，易散繁華亦可傷。  
已逐蝶飛難返樹，不如麝死尚留香。  
珠簾乍捲飄紅雨，金闕徒呼奏綠章。  
鶯老燕忙同一慨，倚欄無語對斜陽。

#### 【台灣相思】鄒穎文

早歲移根客異鄉，年年春後點山黃。  
葉生半月銷風勁，花聚繁枝結豆香。  
力障祝融長護土，遙親日御更流光。  
惜君久棄尋根想，空負嘉名嶺海揚。

### 特別獎

(排名按姓氏筆畫序)

#### 【菊】潘少孟

採摘悠然老圃黃，南山遙望好風光。  
自珍晚節留青史，不與春花鬥豔妝。  
澤畔楚臣餐落蕊，籬邊陶令醉瓊漿。  
九秋將暮饒佳色，放眼金英遍四方。

#### 【送友赴蒼梧】韓樂泉

遠浦連雲樹，晴灘卷暮霞。  
君行仍粵嶠，我意即天涯。  
欲到先愁柳，歸期早及瓜。  
如逢句漏令，須為覓丹砂。

## 學生組

### 冠軍

【雨霽乘隧巴歸家】

陳冠璋 嶺南大學

雨霽晴光耀日斜，夕陽催客漫歸家。  
絳虹萬丈穿雲海，春色無邊醉晚霞。  
堪笑人間多幻化，休思身外任諠譁。  
又登彼岸非舟渡，科技今朝自足誇。

### 亞軍

【風雨】

冼憲漳 香港樹仁學院

風雨江山失夕陽，龍蛇雁鷺起瀟湘。  
乾坤歲月人將老，詩酒情懷氣欲狂。  
扶夢何堪心寂寞，思家賸有淚飛揚。  
堆胸塊壘誰憐我，煙水芳洲日斷腸。

### 季軍

【絲路廢城】

黃令時 浸信會呂明才中學

孤城一望半黃沙，折戟誰從問歲華。  
眾說絲綢經此路，幾多垣瓦早無家。  
蕭蕭紫塞風逾緊，莽莽荒原日又斜。  
開發近聞功令在，桑田他日不須嗟。

學生組

優異獎

(排名按姓氏筆畫序)

【故園遊】

方秀瑩 東華三院黃笏南中學

薄霧纏深巷，軟泥沾我靴。  
樓中時鼓瑟，樹下或嘗茶。  
竹柵圍黃鴨，藤籬繫紫瓜。  
故園鄉味在，客子早忘家。

【登樓】

李慶雄 香港中文大學

寥落江樓意未央，坐悲世事盡茫茫。  
東來薄霧春心冷，北覽神州月夜長。  
兩岸青山空錦繡，一泓碧水自淒涼。  
清輝不減人蕭索，日日憑欄望帝鄉。

【春望】

陳奕生 觀塘官立中學

碧草連天正岑蔚，紅棉吐焰送春光。  
層巒疊嶂呈嵐翠，暖日柔風動客腸。  
誰憐星月改人事，幾許江山易帝王。  
起伏榮衰終似夢，未曾遲暮亦滄桑。

優異獎

(排名按姓氏筆畫序)

【獨倚】

程中山 香港中文大學

獨自倚修篁，秋霞雁幾行。  
蟲鳴山廓靜，霧透晚風涼。  
有恨憐彎月，排愁引滿觴。  
縈心塵事亂，美景帶微霜。

【山中】

楊杰玲 香港中文大學

寢迹松林內，飄然遠萬家。  
碧溪無濁水，粉蝶若繁花。  
喜得春光妙，欣聞鳥語譁。  
涼風吹滿袖，細味雨前茶。

香港公共圖書館  
HONG KONG PUBLIC LIBRARIES

學生組

特別獎

(排名按姓氏筆畫序)

【雷暴】

李卓偉 香港中文大學

風雲相伴寄天涯，雷暴隆隆鬧市譁。  
紫電穿天猶破地，銀珠飛雹又驚花。  
敢侵烈日清炎晝，盡落枯枝孕嫩芽。  
反覆陰晴唯倚道，沾衣行客莫長嗟。

【秋思】

李愷欣 香港專業教育學院（觀塘分校）

下了雲鬢淨了粧，香薰吹度繡檀床。  
涼風點點驚秋意，幽夢遙遙惱月光。  
多少年華多少事，半添憔悴半添狂。  
寒窗靜掩愁難掩，落葉梧桐滿地黃。



【春郊】

梁家恆 香港中文大學

天腳平林映落霞，乾坤三月識山花。  
無邊碧海翻星斗，沒頂彤雲踏浪沙。  
細草幾時迎舞蝶，荒藤何處覓棲鴉。  
滿郊寂寞歸身後，曲盡逶迤一酒家。

【無題】

謝世杰 嶺南大學

雁舞南天夜透涼，清輝疏影勝華陽。  
靈臺矢願循芳澤，虛體無端困考場。  
經冊恥為金玉售，功名忍換杜康嘗。  
歲寒自有尋梅處，粉臉橫山溢暗香。